



Gemeinsam Äntwert vum Här Inneminister, Léon Gloden, a vun der Madamm Justizministesch, Elisabeth Margue, op d'parlamentaresch Fro N° 3441 vum 12. Januar 2026 vum honorabelen Deputéierten Sven Clement zum Sujet "Agressions au couteau et mesures de sécurité publique au Luxembourg".

1. Wéi vill Aggressioune mat Messeren oder anere Stéchwaffe goufen an de leschten 12 Méint zu Lëtzebuerg registréiert, a wéi verdeelen dës sech op déi verschidde Gemengen?

Leider sinn an de leschten zwou Wochen zwou weider tragesch Attacke mat Messere geschitt. Déi presuméiert Täter konnten a béide Fäll vun der Police schnell festgeholl ginn.

Am Abrëll presentéiert d'Police Kriminalitéitsstatistiken a gëtt ausféierlech Erklärungen zu den Tendenzen déi iwwer dat lescht Joer festgestallt goufen. D'Regierung waart awer net op Zuele fir aktiv ze ginn, mee déi kompetent Ministère an d'Police schaffe konstant zesummen drun d'Sécherheet vun alle Bierger am Land ze verbesseren.

An dësem Fall ass eng automatiséiert Recherche an den Datebanke vun der Police, déi sech spezifesch op Aggressioune mat Messeren oder anere Stéchwaffe bezitt, respektiv eng Differenzéierung no der benotzter Waff mécht, net méiglech.

An de polizeilechen Datebanke ginn d'Kategorien "Déifstall" an "Déifstallversich mat Gewalt a Waffen op ëffentlecher Strooss" gefouert. Dëst entsprécht de Kategorien aus dem Code Pénal. Ënnert déi Kategorië falen och d'Fäll, bei deene Stéchwaffe respektiv Messere benotzt goufen.

Fir d'Joer 2025 goufen an deem Kontext national 92 Fäll am Zesammenhang mat Déifstall mat Gewalt registréiert, dovun 80 Fäll als fait accompli an 12 Fäll als Versuch. Dës Zuele sinn nach net definitiv a kënnen nach variéieren, bis déi polizeilech Prozeduren ofgeschloss sinn. Déi definitiv Statistike ginn am Rapport d'activité vun der Police publizéiert, deem am Abrëll erauskënnt.

De follgenden Tableau ass den "Top 5" fir 2025 vun de Gemengen zu Déifstall a Versichten Déifstall mat Gewalt am Allgemengen a Waffen op ëffentlecher Strooss, net just bezunn op Waffe strictu sensu, mee op alles, wat als Waff ka consideréiert ginn (z.B. Tournevis etc.) :

Déifstall mat Gewalt a Waffen	Total	Déifstall	Versichten Déifstall
Lëtzebuerg	40	35	5
Esch Uelzecht	8	7	1
Déifferdeng	6	4	2
Diddeleng	2	2	0
Péiteng	3	2	1

2. Wéi eng konkret Moossname plangt d'Regierung, fir d'Zuel vun Aggressioune mat Stéchwaffen ze reduzéieren?



Zënter hirem Untrëtt ass des Regierung amgaang an dräi Schlësselberäicher ze schaffen, déi faméis 3 Piliere: genuch Personal, modernt Material an adequat Infrastrukturen. Des sinn Elementer déi essenziell sinn, fir dass d'Police hir Aarbecht gutt maache kann. An deem Sënn gëtt och de massive Rekrutement weidergefouert.

Duerch d'Schafung vun der "Unité de police locale" kann eng verstärkt Police Präsenz am ëffentleche Raum garantéiert ginn, souwéi méi Proximitéit tëscht de Policebeamten an der Populatioun.

D'Regierung huet och divers Gesetzprojeten op de Wee bruecht, déi der Police solle méi legal Moyene gi fir d'Sécherheet vun de Bierger ze verbesseren, wéi zum Beispill eng Vereinfachung vun der Prozedur vun de Videokameraen.

3. Gëtt et Pläng fir d'Gesetzgebung am Beräich vum Besëtz an dem Droe vu Messeren oder anere Stéchwaffen ze verschäerfen ?

D'Waffegesetz vum 2. Februar 2022 gesäit eng ganz Rëtsch vu verschidde Reegelunge vir, ënnert déi Messeren, Juegdmesser, aner Schneid- a Stéchwaffen, wéi och Schwärter oder änlech Waffen, an och Sprangmesser, Klappmesser, etc. falen. D'Regierung huet, Stand haut, keng Informatiounen, dass déi ernimmten Zwëschefäll oder Agressiounen hätte kënnen verhënnert ginn, wann d'Waffegesetz aner, zousätzlech oder méi streng Reegele géif virgesinn. Dofir ass och kee Bedarf identifizéiert ginn, fir déi Reegelungen am Waffegesetz ze änneren.

4. Wéi eng preventiv Moosname ginn aktuell ëmgesat, fir d'Gewaltbereitschaft an eise Gemengen ze reduzéieren, a wéi ginn dës evaluéiert?

D'Police setzt eng Rei vu preventive Moosnamen ëm, déi sech op eng verstärkt a sichtbar Präsenz am ëffentleche Raum, gezielte Kontrollaktiounen an eng preventiv Iwwerwaachung konzentréieren. Dës Policepresenz gëtt zousätzlech duerch d'Police Locale mat reegelméissegem Patrouille verstärkt an assuréiert, souwuel zu Fouss wéi och mobil.

Zousätzlech ginn an de Lokaler Kontrollen duerchgefouert, wéi d'Iwwerpréiwung vum Anhale vun de gesetzleche Fernetureszäiten, fir Verstéiss an domat verbonne Konflikt- oder Gewaltpotenzial ze vermeiden.

Weiderhi mécht d'Police Patrouillen an den Zich an am Tram, souwéi am Kader vun der Zesummenaarbecht mat auslänneschen Unitéiten.

Eng weider wichteg preventiv Moosnam ass den Asaz vum Visupol-Videosurveillance-system an ausgewielte Beräicher.

Nieft dëse Moosname setzt d'Police och Sensibiliséierungs- a Preventionsaktiounen ëm, déi sech un d'Allgemengheet richten, fir e sécher a verantwortlecht Verhalen am ëffentleche Raum an am ëffentlechen Transport ze fërderen.



D'Évaluatioun vun dëse preventive Moossname geschitt op Basis vun der Analys vu Kriminalitéitsstatistiken, der Zuel an der Natur vun de Policeinterventiounen, souwéi vun de Réckmeldunge vun de Gemengen an anere concernéierte Partner. Dës Elementer erlaben d'Moossname reegelméisseg ze iwwerpréiwen, unzepassen an dozou geziilt weider ze entwéckelen.

Natierlech gëtt et och Concertatiounen mat den zoustännege Justizautoritéite, fir iwwer déi repressiv Moossnamen ze schwätzen opgrond vun den Analyse vu verschiddene Serie vu Strofdoten.

5. Wéi eng speziell Formatiounen erhält d'Police, fir mat Situatiounen ëmzegoen, wou Stéchwaffe benotzt ginn, a gëtt et Pläng, fir dës Formatiounen weider auszubauen?

Am Kader vun der Grond- a Weiterbildung ginn d'Polizisten systematesch op Situatiounen preparéiert, an deene Stéchwaffen, besonnesch Messer, zum Asaz kommen. D'Ausbildung ëmfaasst progressiv Trainingsseancen, déi op d'Geféierlechkeet vu sou Attacke sensibiliséieren, an d'Analyse vun der Situatioun, d'Asazkommunikatioun, taktesch Prinzipien an de Choix vum appropriéierte Moyen de contrainte behandelen.

Dës Thematik gëtt souwuel an der taktescher Aus- a Fortbildung, an der „Maîtrise de la violence“, an an de Self-Defense-Moduller abordéiert. Ergänzt gëtt dëst duerch obligatoresch Éischt-Hëllef- a Notfallversuergungskoursen, déi d'Beamte befäegen, schwéier Verletzungen ze versuergen, bis d'Rettungsdéngschter iwwerhuelen. Weider gëtt e grouse Schwéierpunkt op Eegesécherung, Fouillen, den Ëmgang mat saisierte Stéchwaffen an d'Beweissécherung geluecht.

Zousätzlech gouf mat der Schafung vum Groupe de support opérationnel (GSO) en neie Moyen de contrainte agefouert, nämlech den Taser. Dësen erméiglecht et, liewensgeféierlech Situatiounen, och bei Messerbedrohungen, mat engem reduzéierte Verletzungsrisiko fir d'Polizisten an déi betraffe Persounen ze kontrolléieren.

D'Formatiounen gi reegelméisseg evaluéiert a weiderentwéckelt, fir se un d'operativ Realitéiten unzepassen.

Lëtzebuerg, de 11. Februar 2026
Den Inneminister,
(s.) Léon Gloden